

**Date – 09/05/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Tuichawng bialtu MLA Pu Rashik Mohan Chakma chuan MLA leh MDC nihna dan ang thlapin a chelh kawp thei tih Governor Hari Babu Kambhampati an a tichiang.**
- 2. MZP chuan MPSC hnuai, Mizoram Combined Competitive Examination leh ACF hna lak dan chhui tura ruat, Inquiry Officer report chu an pawm theilo tih an sawi.**
- 3. Presdent Draupadi Murmu-i chuan waviinah civil mite chawimawina Padma Award a sem dawn.**
- 4. Lok Sabha inthlanpui thawh nganaah Candidate 695 an awm dawn.**

<><><>

**CADC**

**Tuichawng bialtu MLA Pu Rashik Mohan Chakma, tuna Chakma Autonomous District Council ni mek chuan MLA leh MDC nihna dan ang thlapin a chelh kawp thei tih nimin khan Governor Hari Babu Kambhampati an a tichiang.**

**Hemi chungchanga Governor thuchhuahah chuan Pu Rashil Mohan Chakma-an MDC leh CEM a nihna a bansan loh avangin dan a bawhchhia tia Pu RM Chakma laka complain thehluk chu a zirchian thu a tarlang a, Pu Rashil Mohan Chakma hian MLA leh MDC bakah CADC CEM a chelh chungchangah hian India Danpui hnuai anmahni kaihnawih dan tesep hrang hrang te bawhchhiat a nei lo a ni a ti a, hemi avang hian a nihna atanga disqualify na chhan tur a awm lo a ni a ti.**

<><><>

**ZORO**

**Zo Re-Unification Organisation (ZORO) chuan nimin khan Chief Minister Pu Lalduhoma chu a Pisa-ah kawmin, India Sorkar in India leh Burma ramri hung a tum chungchang leh Free Movement Regime (FMR) thiah a tum chungchang an sawipui a.**

**Chief Minister chuan India leh Burma ramri hung a nih loh nan leh zalen taka in kal pawhna dan Free Movement Regime(FMR) hlih a nih loh nan Prime Minister te, Union Home Minister te leh Sorkar laipui thuneitu hrang hrang a sawipui tawh thu a sawi a, Mizoram bikah ramri hung lo tur leh zalen taka in kal pawhna dan Free Movement Regime(FMR) hlip lo turin a ngen**

tawh a ti a. Mizoram bikah hian central chuan hma a lak loh mai pawh a rinawm a ni a ti.

ZORO chuan India Sorkar in India leh Burma border hung a tum leh Free Movement Regime thiah a tum duh loh lantir nan tun thla ni 16 khian Zokhawthar leh Vaphai hmuna Peaceful Rally a neih tur chungchang pawh Chief Minister hi an sawipui a, Peaceful Rally neih chu Chief Minister chuan tha a ti a, kawng hrang hranga tan tlan a ngai a, kiltin atanga beih ho a ngai a ni a ti.

ZORO chuan ni 16 khian India leh Burma border hung leh Free Movement Regime (FMR) thiah tum duh loh lantir nan peaceful Rally Zokhawthar leh Vaphai ah neih a tum a, ruahmanna a kalpui mek a ni.

<><><>

## HORTICULTURE MINISTER

Horticulture Minister Prof. Lalnilawma'n nimin khan Sairang leh Lengpui a Department Warehouse hrang hrang a tlawh a.

Prof. Lalnilawma chuan ZPM policy tam zawk chu Horticulture department kutah a awm tih sawiin Sawrkar hian hmun hrang hrangah warehouse leh godown engemaw zat a nei a, heng te hi tangkai zawka hman dan an ngaihtuah chho zel a, department dang nena tang kawpin thlai thar chhekkhawl nan te pawh hman dan ngaihtuah chhoh zel a ni, a ti.

Mizorama thing leh maute chhawr tangkai dan tur an ngaihtuah tih sawi bawkin Mizorama mau te chu quality tha tak tak a ni a, mau hmang hian thil tam tak a siam chhuah theih a, meihawl mai bakah furniture tha tak tak, ram pawna thawn chhuah theih khawpa tha a siam theih a, thalai hna zawng mekte leh heti lama talent nei tha tak takte tan kawl a eng zel dawn a ni, a ti bawk.

Prof. Lalnilawma hi Pu Lalthazuala Rawite, Chairman, ZIDCO in a tawiawm a, Horticulture Department atangin Director Pu CH Lalmuanpuia, Additional Director Pu Lalhmingmawia Pachuau, Secretary, Pi K Lalrinzuali, Deputy Secretary Pi Lalremruati bakah staff thenkhatten an tawiawm bawka ni.

<><><>

## MNF PRESS CONF

MNF Party chuan SASCI hnuai hmasawna ruhrel siamna tur sum cheng vbc 233 leh nuai 31 hmanlohva kir leh chu Mizoram state leh mipuite tana channa nasa tak a ni a, a mawhphurtu Finance changtu Chief Minister chuan mipui hnenah ngaihsam dil ngei se an ti.

Nimina MNF MLA-ten Aizawl Press Club-a Chanchinbu mite an kawmna-ah Mizoram Legislative Assembly, Leader of Opposition Pu Lalchhandama Ralte chuan ZPM sorkar chu SASCI sum ti lapse tu an nih thu a sawi a, ZPM sorkar chuan SASCI sum chu pe chhuak mai lovin a suasam chu an la thutak hle tih sawiin hemi chungchang hi Mizoram Larsap hnenah an thlen dawn bakah a tul angin Sorkar laipui lamah pawh bawhzui zel an tum tih a sawi a ni.

Pu Lalchhandama Ralte chuan tun thla ni 3-a Chief Minister Pu Lalduhoma'n Press Conference a neih-ah Zoram mipuite hmaah thu dik tawh lo chiang takin a sawi a ti a, Chief Minister chuan MNF Sorkar lai kum 2022 atanga 2023-a SASCI Part I sum cheng Vaibelchhe 200 lapse ang a a sawi chu, thu dik lo a ni a ti a, MNF sorkar hnuai-ah SASCI sum an dawng hmanga hnathawh anih hnuah an dawn cheng vbc 460 atangin vbc 260 vel an hmang bang a, chu hu Model Code of Conduct in a phuar zui tak avangin khawih chet lohvin a awm a ni a ti.

Hemi hnu hian ZPM chu sorkar zui ta in sorkar hmasa in dan ang thlapa PWD registered contractor te chu hnathawk hleithe lovin an siam a, SASCI hman dan tur hrang hrang dan zam te zawm duh lovin he sum hi ZPM sorkar chuan a kawh tang lui flat a, hei vang hian an sum dawn leh tur sancation tawh sa cheng nuai 233 vel chu a lapse ta a ni a ti.

Pu Lalchhandama chuan ZPM sorkar hnuah contractor hna lo thawk tawh te hna chhuh thensak tuma innawrna a na a, an innawr chhung pawh a rei tih sawiin, hetihlai hian Chief Minister chuan contractor work order nei tawh te an tibualo a ti flat a ni a ti a, Mizoramah sorkar a inthlak thin a, contractor te sorkar hmasa in hna a peksa inchhuhsak a awm ngai hriat a ni lo a, he kalphung thar hi a mak hle a ni a ti.

He thil chungchangah hian PWD officer te pawh an khawngaihthlak hle tih a sawi bawh a ni.

Aizawl Press Club a MNF Legislature Party-ten chanchinbu mite an kawmna hunah hian MNF MLA 10-te an tel vek a ni.

<><><>

**BJP PR**

Hetihlai hian BJP Mizoram chuan Mizoram mipui te'n kalphung thar hmuh beisein, ZPM Party an thlang tling a, nimahsela Kalphung thar zuar tute'n a hlui tih dan an entawn leh tho a ni an ti a, mipui zahlohna leh mipui bumna chiang tak ni ah an ngai tih thuchhuah siamin an sawi.

BJP chuan ZPM Party-te kal hmang en hian Mipuiin an beisei Kalphung thar hmuh tur a awm lo hle a, ZPM Party Office-a Minister te'n Departmental Work te pawh Party mite pek chu Party dang tih dan a nih ve tho avangin, an tih ve tho tur a nih thu an sawi ta mai chu pawh an ti a, hei hian mipui Sorkar nilo Party Sorkar tho a nih zia tichiang tu a ni a. Tun Sorkar ah pawh Departmental Work hian pawngsual a tawh ve leh ngei dawn a ni tih a chiang hle ah BJP Mizoram chuan a ngai an ti.

Mizoram mipui hian MNF leh Congress an hnawl na chhan chu Kalphung thar tha zawk mipui Sorkar kan beisei vang chauh a ni a, Inthlan dawn ah Chief Minister chuan, MNF leh Congress te tih ang an tih ve loh tur thu Mipuite hnenah ring takin a sawi chung a, Sorkar tawh te tihdan ang tho an tih ve duh avang hian kalphung thar hi a taka Mizoram in a hmuh a rinawm ta lo hle a, Mizoram mipuite zahlo takin an bum a ni tih hi Mizoram mipui te a hre tu an ni mek a ni, an ti.

BJP Mizoram chuan hetiang taka Mizoramin Political Party an ruih chilh hi ram leh hnam ang pawh a a hnufual chhan ni ah an ngai a, Political

Party te'n mipui hmaa an intiamna ang a hma lak hi an tih ngei tur a nih laia, mipui hma a an thutiam te an tih theih loh hnua sawi mam leh chin tawh loh ni se an ti.

<><><>

**MZP**

Mizo Zirlai Pawl MZP chuan MPSC hnuaia, Mizoram Combined Competitive Examination leh ACF hna lak dan chhui tura ruat, Inquiry Officer report chu an pawm theilo tih an sawi.

MZP chuan he thila felhleh awm ni a an hmuh, hemi avanga MPSC Chairman bang tura an lo phut hial tawh hnuaiah Inquiry Officer report chu vawiin thlengin MZP hi hriattir a la ni lo hrim hrim ani an ti a, a report hi CM Press Conference atangin MZP chuan a hre ve chauh a, tunah RTI hmangin an dil mek chauh a ni an ti a, tuna report siamtu, leh a chhuitu IAS officer pension chuan MPSC hun rei tak lo enkawl tawhtu a nih avangin, MPSC mualpho loh na turin thutlukna a siam ta mai em ni tih hi MZP zawhna a ni, an ti.

Dik lo thei loa inngai, MPSC hna lak dan hi MZP chuan hriatthiam har a ti hle tih an sawi a. Hna sang ber laknaah, answer paper leh mark tabulation-ah correcting fluid nasa taka hman a ni chungin tihsual an nei lo chu MZP chuan mak a ti, an ti a, duhsak zawngte tih tlin theihna kawngka zau tak System- MPSC-in a hmang a, a himlo a ni an ti

MZP chuan ACF hna lak, exam vek tawh hnua Answer paper endik loh tur tih chungchang chu Inquiry Officer hian a chhui tel lleh tel loh an hre duh tih an sawi a, Department Recruitment Rules ang ni loa Exam conduct-tu MPSC chuan, mawhphurhna lain, exam tawh hnu answer paper hi endik tlang ngei se a duh a. Thalai hna zawng mekte inbuatsaihna tithlawn lo se a duh a ni, an ti.

<><><>

**PRESIDENT**

President Draupadi Murmu-i chuan vawiinah civil mite chawimawina Padma Award a sem dawn. Delhi-a President chenna Rashtrapati Bhavan-ah Padma Award sem inkhawm hi neih a ni dawn a ni.

Padma Award hi chhawng thumah then a ni a. Chawimawina sang ber hi Padma Vibhushan a ni a, Padma Bhushan leh Padma Shri ten an dawt a ni. Heng award te hi ramchhunga civil mi kawng hrang hranga mi hmingtha leh chawimawi tlakte hnenah hlan thin a nia. Kumtinin Republic Day-ah Padma Award dawng turte hi puanzar thin a ni a.

Tun tum Padma award dawng tur zingah hian Mizoram atangin Thutak Nunpuitu Team TNT dintu leh enkawltu Dr. Sangthankima chu Padma Shri dawng tura thlan a ni.

Thla hmasa April ni 22 khan President hian Padma Vibhushan pathum, Padma Bhushan pariat leh Padma Shri 55 a lo sem tawh a ni.

<><><>

**LOK SABHA**

Lok Sabha inthlanpui thawh nganaah Candidate 695 an awm dawn a. Tun thla ni 20 ah vote thlak a ni ang. Inthlan thawhngana hi state 6 leh Union Territory pahniha Parliamentary Constituency 49 ah buatsaih a ni dawn a. Nomination 1586 thehluh thehluh ni a. Tun thla ni 3 thleng kha hun hawn niin a tukah endik a ni a, nomination 749 pawm a ni.

Inthlan thawh nganna neihna turte hi Uttar Pradesh ah seat 14, Maharastra ah 13, West Bengal ah 7, Bihar leh Odisha ah 5, Jharkhand ah 3 leh Jammu and Kashmir leh Ladakh ah pakhat ve ve te a ni.

<><><>

#### FINANCE COMMISSION

16th Finance Commission chuan mimal leh pawl anga rawtna neite tan hun a hawng. Finance Commission chuan an hna leh hmalakna turahte thurawn leh rawtna nei apiangte tan an inhawng reng tih an sawi a. Heng rawtna te hi an website ah lutin 'Call for Suggestions' tihah thehluh turin a ti a ni.

16th Finance Commission hi ram danpuiin a phut angin din a ni a, Chairman atan Dr. Arvind Panagariya dah a ni.

<><><>